



Disc 2, Part 1: Hawai‘i Story

Aloha kākou. I kēia manawa, e huaka‘i ana kākou i ka Moku o Keawe, ‘o ia ho‘i ‘o ka mokupuni ‘o Hawai‘i! ‘O ka mokupuni nui loa ia o nā mokupuni Hawai‘i a pau. ‘O ka home ia o ka wahine ‘o Pele. ‘O Halema‘uma‘u ka inoa o ka lua pele, ma Kīlauea. Ma luna a‘e o Kīlauea, aia ‘o Mauna Loa e noho mālie ana. He mauna loloa maoli nō ia ke nānā aku.

‘O Mauna Kea paha ka mauna kaulana loa o Hawai‘i. ‘O ka home ia o Poli‘ahu, ke akua wahine o ka hau, a ‘o ia ho‘i ka mauna ki‘iki‘e loa o ka honua nei, mai lalo o ka moana a hiki i kona wēkiu. Ma kahi o ke kanakolu-kūmākahi kaukani kapua‘i kona ki‘eki‘e! Ma luna ho‘i o Mauna Kea nā hale kilo hōkū o nā ‘āina like ‘ole.

Aia nā kuahiwi o Kohala ma ka ‘ākau o Mauna Kea. ‘O ia nā mauna kahiko loa o ka mokupuni. Ma laila i hānau a hānai ‘ia ai ‘o Kamehameha, ke ali‘i kīlou moku o Hawai‘i ma kahi o ka makahiki 18 haneli.

He nui ka hana mahi‘ai ma Hawai‘i. E ‘ike ana paha kākou i nā pua nani, nā makeima, nā kope, nā mīkana, a me nā hua‘ai like ‘ole. E ‘ike ana ho‘i i nā kahua pipi, e like me ka mea kaulana ‘o Pāka. Ma kahi o ka 250,000 ‘eka kona nui!

‘O nā inoa o nā moku o Hawai‘i, ‘o ia ho‘i ‘o Hilo, Puna, Ka‘ū, Kona Hema me Kona ‘Ākau, Waimea, Kohala, a me Hāmākua. He ‘oi aku ka po‘e e noho ana ma ‘ane‘i i ka ho‘okahi haneli kaukani. Nui nā malihini e makemake ana e holoholo i nā Kona, no ka mea, he pā nui ka lā ma laila. Ma ka ‘ao‘ao Ko‘olau, ‘o ia ho‘i, ‘o Hāmākua, Hilo, a me Puna, he ‘ano nui nō ka ua i kekahi manawa. No laila, he nui nā hōkele ma ka ‘ao‘ao Kona.

‘A‘ole kākou e huikau i ka inoa ‘o Hilo. He ‘elua wahi i kapa ‘ia ‘o Hilo: ‘o kekahi ka moku, mai kai a hiki i uka loa i waena o Mauna Kea me Mauna Loa. ‘O kekahi “Hilo”, ‘o ia ke kauhale ma kai, nona ke kahua mokulele, nā hale kū‘ai, a me nā hale ‘āina maika‘i!

‘O ka ‘ōhi‘a kekahi kumu lā‘au e ulu ana ma ka nahele o Hawai‘i nei. He lā‘au ‘o‘ole‘a kona i kūpono no nā pou hale i ka wā kahiko. ‘O ka pua o ia kumu, he “lehua” kona inoa. He pua ‘ula‘ula ia. ‘O ka pua lehua ka pua nani e kaulana nei ‘o Hawai‘i. He uluwehiwehi maoli nō ka nahele i nā pua lehua!